



Broj: KSI-09-205/26

Datum: 11.03.2026. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi, podnesenoj protiv nosioca javne funkcije I. L., šefa Odjeljenja za komunalne poslove Brčko distrikta Bosne i Hercegovine, na 146. sjednici održanoj dana 11.03.2026. godine, donosi

ODLUKU

Postupak za odlučivanje o sukobu interesa protiv nosioca javne funkcije, I. L., šefa Odjeljenja za komunalne poslove Brčko distrikta Bosne i Hercegovine neće se pokrenuti, obzirom da iz dostavljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

Образложење

Dana 25.02.2026. godine Komisiji za odlučivanje o sukobu interesa od strane Kancelarije za prevenciju korupcije i koordinaciju aktivnosti na suzbijanju korupcije u Brčko distriktu Bosne i Hercegovine dostavljen je na postupanje predmet broj: 48-19-11/26 (1/26) od 06.02.2026. godine, kao nadležnom organu.

U dostavljenom spisu, navedeno je da je Kancelarija za prevenciju korupcije i koordinaciju aktivnosti na suzbijanju korupcije zaprimila anonimnu prijavu sa indicijama koruptivnog ponašanja za nosioca javne funkcije I. L., šefa Odjeljenja za komunalne poslove Brčko distrikta Bosne i Hercegovine, a u kojoj se navodi da je I. L., šef Odjeljenja za komunalne poslove Brčko distrikta Bosne i Hercegovine učestvovao u zaposlenju svog oca M. L. u Zavodu za planiranje, projektovanje i razvoj Brčko distrikta Bosne i Hercegovine, te da je otac potom angažovan i imenovan kao savjetnik za izgradnju cjevovoda, za koji je kao izvođač radova angažovano privredno društvo ██████████ d.o.o. Brčko. Obzirom da se prijava odnosi na eventualni sukob interesa nosioca javne funkcije, Kancelarija je predmet dostavila na postupanje Komisiji, kao nadležnom organu. U skladu sa Sporazumom o saradnji zaključenim između Kancelarije i Komisije, broj: 02-19-216/24 od 24.10.2024. godine, Kancelarija traži da Komisija, u okviru svojih zakonom propisanih nadležnosti, preduzme odgovarajuće aktivnosti radi ispitivanja navoda iz prijave, te da Kancelariju obavijesti o toku postupanja i ishodu u predmetnoj stvari.

Članom 2. tačka c) Zakona o sprečavanju sukoba interesa u institucijama Brčko distrikta Bosne i Hercegovine propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Uvidom u Registar javnih funkcija i nosilaca javne funkcije, koje vodi Komisija, utvrđeno je da I. L. obavlja funkciju šefa Odjeljenja za komunalne poslove Brčko distrikta Bosne i Hercegovine na osnovu Odluke broj: 33-005211/24 od 13.12.2024. godine, te je obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

U cilju provjere navoda iz prijave da li postoji sukob interesa, Komisija je po službenoj dužnosti pokrenula postupak provjere informacija i uputila dopis: Zavodu za planiranje, projektovanje i razvoj Brčko distrikta Bosne i Hercegovine, Direkciji za finansije, Trezor Brčko distrikta Bosne i Hercegovine, Kancelariji za prevenciju korupcije i koordinaciji aktivnosti na suzbijanju korupcije u Brčko distriktu Bosne i Hercegovine i Odjeljenju za komunalne poslove Brčko distrikta Bosne i Hercegovine.

Naime, uvidom u dokumentaciju, dostavljenu od strane Zavoda za planiranje, projektovanje i razvoj Brčko distrikta Bosne i Hercegovine broj: 06-251/26 od 02.03.2026. godine proizilazi da M. L. nije bio zaposlenik Zavoda za planiranje projektovanje i razvoj Brčko distrikta Bosne i Hercegovine, te da je bio angažovan po ugovoru o djelu na poslovima: konzultant na izradi hidrotehničkog dijela projekata, unutrašnja kontrola hidro projekata, kontrola usaglašenosti hidro projekata sa lokacijskim uslovima gradnje u periodu od 01.07.2025. godine do 01.10.2025. godine. Zavod za planiranje, projektovanje i razvoj Brčko distrikta Bosne i Hercegovine se ne bavi izgradnjom, nego isključivo izradom prostorno planske i investicijsko tehničke dokumentacije, kao i izradom stručnih studija i elaborata za potrebe Vlade Brčko distrikta i institucija Distrikta, pa tako nije bio izvođač radova niti je na bilo koji način sudjelovao u projektu za izgradnju cjevovoda niti je ikoga angažovao za te potrebe.

U dokumentaciji Kancelarije za prevenciju korupcije i koordinaciju aktivnosti na suzbijanju korupcije u Brčko distriktu Bosne i Hercegovine broj: 33-19-57/26 (1/26) od 03.03.2026. godine navodi se da Kancelarija na osnovu dostavljenih podataka vrši unos u jedinstvenu evidenciju (bazu), odnosno Registar zaposlenih i Registar imenovanih lica, ali da su za tačnost i potpunost podataka odgovorni organi i institucije koje ih dostavljaju. Uvidom u Registar zaposlenih lica utvrđeno je da je pod imenom i prezimenom M. L. evidentirana jedna osoba, koja je bila zaposlena u JP „Komunalno Brčko“ d.o.o. Brčko distrikt Bosne i Hercegovine na neodređeno vrijeme i to u periodu od 01.01.2008. godine do 10.02.2024. godine. Istovremeno, u Registru imenovanih lica nije evidentirana nijedna druga osoba pod navedenim imenom i prezimenom.

U dokumentaciji Odjeljenja za komunalne poslove Brčko distrikta Bosne i Hercegovine broj: 48-000207/26 od 03.03.2026. godine navedeno je da pravna osoba ██████████ d.o.o. Brčko nije potpisnik niti jednog ugovora čija je druga strana Odjeljenje za komunalne poslove počevši od 15.01.2025. godine i stupanja na dužnost i formiranja trenutne Vlade Brčko distrikta Bosne i Hercegovine. Odjeljenje kao nadležno tijelo javne uprave ne potpisuje ugovore s podizvođačima radova, te da M. L., počevši od 15.01.2025. godine nije bio angažovan od strane Odjeljenja za komunalne poslove ni po kojem osnovu, odnosno nije potpisan nikakav ugovor

između Odjeljenja za komunalne poslove i M. L.. Poklanjajući vjeru dostavljenom odgovoru, proizilazi da šef Odjeljenja za komunalne poslove Brčko distrikta Bosne i Hercegovine nije potpisivao bilo kakav ugovor s M. L.

Uvidom u dostavljenu dokumentaciju, odnosno dopis od Direkcije za finansije, Trezor Brčko distrikta Bosne i Hercegovine broj: 13.9-04.2-265/26 od 04.03.2026. godine dostavljene su isplate za 2024. godinu na ime M. L. vezano za isplatu novčane pomoći i subvencija odnosno isplata po drugim pravnim osnovama. Navedena sredstva su isplaćena na račun M. L., dok Direkcija za finansije Brčko distrikta Bosne i Hercegovine ne raspolaže sa podacima pojedinaca.

Članom 9. Zakona o planiranju, projektovanju i razvoju Brčko distrikta Bosne i Hercegovine, propisano je da su djelatnosti Zavoda: izrada dokumenata prostornog planiranja Distrikta (strategija prostornog razvoja Distrikta, prostorni plan Distrikta, urbanistički plan, sprovedbeni planovi: zoning plan, regulacioni plan, urbanistički projekat, plan parcelacije) u skladu sa zahtjevima i odlukama nadležnih organa, izrada strategija i planova društveno-ekonomskog razvoja Distrikta, izrada planova i projektne dokumentacije za izgradnju, sanaciju i rekonstrukciju komunalne, putne infrastrukture i javnih objekata i javnih površina, kao i planova uređenja građevinskog zemljišta, stručno-tehnička priprema za izradu godišnjeg programa za donošenje prostorno-planske dokumentacije i planova društveno-ekonomskog razvoja, izrada elaborata o urbanističko-tehničkim uslovima i davanje stručnog mišljenja na zahtjev nadležnih organa, izrada sektorskih studija, planova i elaborata, izrada projekata uređenja i infrastrukturnog opremanja poslovnih zona u koordinaciji s nadležnim organima javne uprave, učestvovanje u pripremi propisa iz oblasti prostornog uređenja i građenja (zakona i podzakonskih akata), iniciranje rješavanja imovinskopravnih odnosa radi realizacije infrastrukturnih projekata predviđenih kapitalnim budžetima Distrikta, u saradnji s nadležnim odjeljenjima, podrška nadležnim organima javne uprave na pripremi i predlaganju kapitalnog budžeta i drugih investicionih planova utvrđenih strateškim planovima Distrikta, podrška za pribavljanje svih potrebnih saglasnosti, dozvola i rješenja za građenje, u saradnji s nadležnim organom javne uprave, osigurava elaborate o geomehaničkom ispitivanju terena za gradnju samo za izradu prostorno-planske dokumentacije, vrši arhitektonsko i inženjersko savjetovanje, stručna podrška nadležnim organima javne uprave razvoju geografsko informacionog sistema Distrikta u oblasti planiranja razvoja, izgradnje, rekonstrukcije i sanacije javnih objekata i komunalne infrastrukture, upravljanje bazama podataka iz nadležnosti Zavoda, obezbjeđivanje neophodnih podataka o komunalnim uređajima i komunalnoj infrastrukturi potrebnih za izradu projekata i planova infrastrukture, izrada projektne dokumentacije i planova u postupku zaštite objekata kulturnog i historijskog značaja i prirodnog naslijeđa; obavljanje poslova izdavanja časopisa i periodičnih publikacija iz oblasti prostornog uređenja i urbanizma, obavljanje poslova projektantskog nadzora izgradnje infrastrukturnih i građevinskih objekata, pružanje konsultantskih usluga u oblasti planiranja, projektovanja i vođenja investicija, vršenje drugih stručnih poslova utvrđenih zakonom i drugim propisima koji se odnose na oblast planiranja, kao i poslova koje mu odredi osnivač ili Vlada.

Prema tome, vidljivo je da Zavod za planiranje, projektovanje i razvoj Brčko distrikta Bosne i Hercegovine u svojoj nadležnosti nema poslove izgradnje, pa prema tome ni poslove izgradnje cjevovoda kako je navedeno u dostavljenoj prijavi.

Komisija je postupila u okviru svojih nadležnosti shodno sadržaju dostavljenih odgovora.

Kako u provedenom postupku nisu utvrđeni elementi kršenja zakonskih odredaba, Komisija je cijenila da ne postoji zakonski osnovi za dalje vođenje postupka, te je odlučeno kao u dispozitivu Odluke.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 od strane nosioca javne funkcije.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

1. [REDACTED], Brčko distrikt BiH,
2. Evidencija
3. Arhiva.